



五月節

五月節，係麼个節？還細時節，印象盡深个就係有粽子好食个日仔，對童年个係來講就係粽子節，食粽子過節。蘿蔔乾、蝦蜆仔、香菇、靚豬肉摺鹽、胡椒粉、辣椒仔共下炒到噴香个味緒，囑到糯米飯、包到兩皮麻竹葉裡肚，蒸熟來，該竹葉、焙料、糯米飯个香氣，黏時牽出肚飢飢个胃腸，還有緊吞个口涎水，還過目瞞瞞仔个眼神。對童年到這下，阿姆綑个粽子，就係過五月節盡好个味緒，無講花蓼，這生人定著毋會毋記得。

五月節，係麼个節？惱起來也算係龍船節。毋記得哪央時，電視入到人家个屋下去放映，又同各地慶祝五月節个划龍船比賽，帶到咁電視項去轉播。五月節，各縣市政府个主辦單位，會在淡水河、冬山河、南寮地中海、明德水庫、中港溪、彰濱吉安水道、東石漁港、臺南安平運河、愛河、東港河、鯉魚潭這兜所在，辦理划龍船比賽。較大、較有名个比賽，電視臺輒常會有實況轉播，對看電視大个人來講，定著有看過龍船頂項一群撐船手，在鼓手打起節奏有力个鼓仔聲，大家同心協力、抽肱另命加油之下，船仔加速前進，目金金仔緊看哪條船仔个搶旗手，先搶著標旗个就贏咁，故所講，五月節係龍船節，應該講得過，正著。

五月節，係麼个節？讀過制式教育或者講受過愛國教育个人，定著知得，五月節係詩人節。為著紀念古時代个愛國詩人屈原，就摺佢安到詩人節。相傳，盼望政治改革个屈原，毋單止無受著楚王个信任，還遭受著自私自利貴族个排斥、奸臣小人个陷害，兩擺分楚王流放邊疆，包尾，看自家恁樣个情況，老咁又無受著重用，定著無法度實現自家个理想，就恁仔跳入汨羅江自殺消忒去。這下，在政府機關个鼓勵、民間社團个支持之下，詩人節紀念詩人个活動，有作詩、吟詩、唸詩、唱詩等，主題多元、內容豐富，差毋多逐年就會在全臺各地來展演！

五月節，係麼个節？今這下，敢還有人在屋前掛菖蒲、屋下食雄黃酒、用樟樹葉洗身腳，來過五月節？總係會在電視裡肚，看大人摺細人仔無閒在當晝時節，同雞卵立燈起來，講這係五月節正有个現象。毋信个人，做得尋其他个日仔來試看啊咧！

五月節係粽子節、係龍船節、係詩人節、係立卵節，當然也係大家放棄个時節。

作者：邱一帆

☆詞彙學習☆

【五月節】ng` ngied jied`：端午節。

【花蓼】fa` liau`：說謊。

【蝦蜆仔】ha` bi` e`：小蝦仁。

【抽肱另命】cu` goi` nang miang：聲嘶力竭。

【靚豬肉】jiang` zu` ngiug`：瘦肉。

【定著】tin cog：一定。

【焙料】poi liau：配料。